



**Uunga siunnersuut Aalisarnej pillugu Inatsisartut inatsisaat**

(Aalisarnermut Piniarnermullu Naalakkersuisoq)

(Pingajussaaneerneqarnera)

Ileqquugaluarpoq Aalisarnermut ataatsimiititaliami suleqatit suleqatigiilluarsimanermut qutsavigisarlugit pisariusumut suliarujussuarmullu soorlu uunga aalisarnermut inatsimmut atatillugu. Ajoraluartumilli taamaaliorsinnaangilanga.

Ataatsimiititaliami sulineq IA-p aamma Siumut tungaaniit torersuusimangilaq. Taakku partiit kimulluunniit tusarnaarumasimangillat. Imarisaanut ilumoorussamik isumaqatiginninniarnissamut piumassuseqarsimangillat. Soorlulu maluginiarlugu, una inatsit partiinit taakkuninnga qulliusunit marlunnit siumoorluni akuerineqareersimasoq. Tamanna tamat oqartussaanerannut pitsaanngilaq.

Taamaattumik ulloq una ukiorpassuarni tulliuuttuni eqqaamaneqartussaavoq ullortut, IA aamma Siumut aalajangermata aalisarnermut inatsimmik akuersissallutik, aalisartunut nunattalu sinneranut annertuunik kingunerlutsitsisussamik.

Inatsit, pisortat piginneqatigiiffiiniq namminersortuniit pingaernerutitsisoq, tamanna unammilleqatigiinnermik equtitsineruvoq.

Inatsit, suliffinnik akeqartussaq.

Inatsit, siunissami aalisarnermut aningaasaliinissamut ajornartitsilluinnangajattussaq.

Inatsit, aalisarnerup ullumikkornit sunniuteqannginnerunissaanik kinguneqartussaq.

Suli taajugassarpassuaqaraluarpunga.

Eqqortorli alianartooq aana, taassuma aalisarnej pillugu inatsisip, nunatta aningaasaqarniarnera innarlissammagu. Taassuma kingunerissavaa, peqqinnissaqarfiup pitsanngorsarnissaanut aningaasat ikinnerulissasut. Aningaasat ikinnerusut meeqqat atuarfiani pitsaassutsip kivinnissaanut. Aningaasat ikinnerusut ulluunerani paaqqinnittarfiit pitsaanerulersinnissaannut. Aningaasat ikinnerusut utoqqarnut. Aningaasat ikinnerusut timersornermut. Naatsumik oqaatigalugu, aningaasat ikinnerusut nunatta pitsaanerpaamik ingerlannissaanut.

Tamanna ugguarnartorujussuartut isigaara. Akerlianilli qularnangilluinnarpoq, kina pisuunersoq. Qularnangilluinnarpoq, akisussaaffik sumut inissinneqassanersoq.



Kingulissatta eqqaamajumaarpaat, IA-p aamma Siumup immikkut ilisimasallit, immikkut ilinniarsimasut, aalisartut, aalisartut kattuffii, aalisarnermik ingerlatallit uagullu illuatungiliuttut tusaajumangimmatigut. Kingulissatta eqqaamajumaarpaat, IA-p Siumullu una inatsit akuerimmassuk kingunerluutissai pillugit mianersoqquterpassuaqaraluartoq.

Demokraatit tamanna tunngavigalugu aalisarnerq pillugu inatsisissatut siunnersuummut isumaqataanani taasivoq.